

## “Benefisionan” di Karnaval

Kon ta pusibel ku algun hende ta papia negativo di nos gran fiesta, karnaval? Kisas ta pasobra nan ta lubidá kuantu nos islanan ta benefisiá di karnaval. Si, esei mester ta e motibu! P’esei talbes lo ta bon pa rekordá e benefisionan di e fiesta aki.

Djis kòrda e entrada enorme ku karnaval ta produsí! Wèl, sikiera esnan ku ta produsí i bende produktonan alkohólíko ta gosa e entrada! Serbes kisas ta laga algun pòtmòni blo bashi sin por sòru pa nan mes famia. Ma nos mester aploudí nan sakrifisio personal...pa oumentá salario di otro hende! Karnaval klaramente ta enkurashá e tipo di “generosidad” aki.

Ningun hende ku dos plaka di sintí por oponé kontra e fiesta si nos kòrda e situashon ekonómiko di nos islanan. Tantísimo hende ta gasta tantísimo sèn pa bebe tantísimo serbes pa djòdjò tantísimo ku si gobièrno lo oumentá omzetbelasting pa serbes, den e dos wikèntnan di karnaval por kubri e debe di Antia den su totalidat i evitá tur medida! Sigur karnaval ta nesesario!

Si, si, tin aksidente, problema familiar, maltrato, pelea, èts. komo resultado di uso di e bebida di “primera nesetidat”. Ma kòrda, ta hende ta skohe pa bebe serbes durante e fiesta. Ta mas kla ku di dia ku karnaval no ta responsabel pa esei...tòg...?

Ta bèrdat ku atrako, tiroteo, hinkamentu, ladronisia i hopi otro krimen ta eskalá durante dianan di karnaval. Ma ta impusibel ku karnaval por tin algu di hasi ku esei. Impusibel! Eseinan ta sosodé pa kasualidat...sigur!

Polis a duda pa pone òrdu durante karnaval. Ta difisil pa komprendé esei. Karnaval sigur no ta stimulá hende pa bira agresivo i falta ku respèt. I tur hende sa ku durante i despues di e marcha kos ta bai asina rustig i pasífiko ku kasi no tin mester di polis mes.

I e timentu di serbes riba polis, èts. di bèrdat no ta falta di respèt. Nò, no por ta! Ta djis un wega. Dikon polis mester rabia pa un ko’i kèns asina? Nan mester tuma esaki komo un oportunitat pa siña desaroyá mas toleransia. Ademas, weganan asina no ta duna un mal ehèmpel na nos yunan òf siña nan pa no respetá polis... Impusibel...nò...?

Por tin desnudes den karnaval na otro parti di mundu. Ma na nos islanan, esei no ta e kaso. Tur trahe ta desente sin intenshon pa sedusí. Ma asta si esei tabata e kaso, e tin su banda positivo. Nos ta desfrutá di nos libertat di ekspreshon i na mesun tempu ta siña apresia bunitesa di e kurpa humano. Sigur sigur ningun bistí tin afekto ningun riba e aktonan inmoral ku ta tuma lugá.

Ta bèrdat ku tin algu papiá tokante “beibi di karnaval” na òktober i novèmber. Ma pakiko nos tin ku hasi tantu beheit pa ku algun mucha muhé tineidjer ku ta na estado? Si nan mester keda sin kaba skol, biba den pobresa, kria e yu ku poko tempu pa siña nan normanan i balornan...esei tòg ta nan problema. Gobièrno tin sèn di sobra pa paga onderstand. Maske e mama mes ta mucha, wela t’ei nèt pa esei...pa kria e beibi...i mama. I semper por mata e yu via aborto promé ku e nase. Si nan ta haña yu nuebe luna despues di karnaval, ta djis pa kasualidat! No ta pusibel ku karnaval por a influensia esaki...nò?

Si...t’asina mes e ta! Hende ku ta papia kontra karnaval simpelmente no ta apresia kuantgu “benefisio” nos ta gosa komo resultado di e fiesta aki. Of...por ta nos perspektiva ta kiboká...? Nò! No por ta! Sigur nos ke enkurashá mas hende pa desfrutá di buracheria, problema inter-personal, krimen, aktonan inmoral, embaraso hubenil, èts. Esei ta sigur!...tòg? ...nò?

Beibel ta bisa: *“E konklushon...ta: teme Dios i warda Su mandamentu-nan...Pasobra Dios lo trese tur echo na huisio, tur kos ku ta skondi sea bon òf malu”* (Ekleziastes 12:13-14)